

O FARAON BIKNEL E ROMEN

So shunjom katar phure manushendar, odova ka vakerav. E phure manuha vakerde mange kay e roma ule butyarne manusha – zanayatchie. Li o Moyseeva manusha ule roborya. Odova vreme e romen ulo thagar, faraoni. Ov ikardyas len sar roborya. Lachhes, ama e Moyseeskere manusha na mangle po-but te oven roborya thay lile te nashen. Lachhes, ama amaro faraoni tsidindyas pal lende te irinel len. On gele zhi ko mori, kay o Moysey lilyas te molinel pes o devleske te phutarel lenge drom ko mori, ta te nakhen. O devel shundyas les. Phutardyas lenge drom thay on nashle. Amaro Faraoni vakerdyas:

– Te resava tut, ka mudarav tut!

Lachhes, ama ov bistardyas te phenel o devleske, chi resela len ka irinel len napale. Phanlilo o mori. E Moyseeskere manusha nakhle akaya rig, a amaro Faraon achhilo katar. Ov ulo but holyame, soske nanay kon te kerel i robsko buti. Lilyas te biknel e romen.

Aki soske e roma si katar i sasti phuv.